

Михаил Николаевич Пеймер

Коми Республикаса Юралысьлөн 2024 во моз тӧлысь 19 лунся 98 №-а Индӧдӧн сетӧма «Почёта гражданин» Коми Республикаса медвылыс почёт ним.

Чужис 1923 вося урасьӧм тӧлысь 25 лунӧ Харьковын.

Сэк, кор заводитчис Айму вӧсна Ыджыд тыш, Михаил Николаевич вӧлі Артиллерист-ракетчикьяслӧн 1 гвардейскӧй Москваса военнӧй училищын курсантӧн. Ракетнӧй установкаяслӧн гвардейскӧй полкын тышкасис Брянскӧй фронт вылын. 1942 вося моз тӧлысьянь взвод, а сэсся и «катюшаяслӧн» батарея, кутшӧмьясӧн веськӧдліс 19 арӧса гвардияса лейтенант Пеймер, зырис вӧрӧгӧс Сталинград дорын. Участвуйтіс «Багратион» операцияын, мездіс Белоруссия, Литва, воуйтіс Асыввыв Пруссияын.

Михаил Николаевич Пеймерлы сетісны «Боевӧй заслугаясысь», «Смеллунысь» медальяс, Гӧрд Звезда орден, но сылысь фронтвывса героическӧй туйсӧ нем жалиттӧг орӧдісны. Кенигсбергын 1945 вося урасьӧм тӧлысь 6 лунӧ Михаил Николаевичӧс арестуйтісны сыысь, мый сійӧ быттӧкӧ нуӧдіс сӧвет власьтлы паныд агитация, да пуксьӧдісны 10 во кежлӧ.

1945 вося лӧддза-номъя тӧлысьын этапӧн вайисны Воркутаӧ. Уджалис 3 №-а шахтаын участка проходчикӧн, маркшейдерӧн. 1948 вося рака тӧлысьын, кӧть сійӧ пыр на пукаліс дзескыдінын, Михаил Николаевичӧс индісны Рытыввывбокса стрӧитан шахтаясӧн виль стрӧйтчан веськӧдланінын планово-производственнӧй юкӧнса начальникӧн. Сӧрӧнджык уджаліс Воркута ю вылын пором стрӧитігӧн сменаса начальникӧн. Сооружениеыс сетіс позянлун могмӧдны карсӧ ваӧн. Михаил Николаевичӧс лэдзисны дзескыдінысь 1952 вося ода-кора тӧлысьын, а 1965 вося лӧддза-номъя тӧлысьын сійӧс реабилитируйтісны да бӧр примитісны партияӧ.

Мездӧм бӧрас Михаил Николаевич уджаліс «Воркутдорстрой» трестын, «Печоршахтострой» комбинатын. Сійӧс индісны «Печоршахтострой» комбинатлӧн производственнӧй юкӧнса начальникӧн, 17, 18 да 25 №-а шахтаяс вильмӧдан пускӧвӧй комплекса начальникӧн. Стрӧитіс «Комсомольскӧй» шахта, Воркута карса очистнӧй сооружениеяс, Ва шонтан шӧр котельнӧй, Уса ю вылын ва босьтанінъяс. Веськӧдліс планӧ пырттӧм (народнӧй) стройкаясӧн. Тайӧ Воркута карса парк, Воркута аэропортлӧн лэбзян-пуксян полоса, Пионерьяслӧн двореч. Михаил Николаевичлӧн веськӧдлӧм улын стрӧитӧма Воркута карса да посёлокьясса став автомашина туйыс, аэропорт, виль шахтаяслы кӧрт туйяс, бурмӧдӧма-мичмӧдӧма шахтаяс, Воркута карса уличьяс, вӧчӧма Воркута да Аячьяга юяс вомӧн посьяс.